

Ki te Etita.

E ta tena ra koe. Ki te pai koe homai tetahi wahi o tau pepa hei perehitanga iho i nga mahara kei roto i ahau Ina te he kei mate roto. I ahau i Moe-angiangi ka tae ake tau nupepa tuatahi o te "Toa Takitini" kanti te pai o nga korero o roto ara he hangai ki nga whakaaro o tenei takiwa e matea-nuitia nei e te ngakau kia pera te haere o nga korero ki te iwi. He nui tooku tangi iho ki tau tono e mea ake nei koe kia manaakitia te pepa, a, ma te kaha o te tangata te tangata ka ora ai. E tika ana tenei korero, na konei ahau i tuhi atu ai. Kaati he patai taku kia koe—Ka mana ranei i a koe taku tono atu kia puta he kupu tohutohu ki nga wahine mo nga tikanga katoa e pa ana kia ratou? Ki te taea e koe te pera, ka puta tonu he maramatanga ki nga Ropu wahine e wawata nei kia akona e ratou etahi tikanga mo nga mahi o te kainga. Ki te taea ana te pena mai ka waiho tena hei tohu kei te mahara mai ano koutou nga tane kia matou ki nga wahine. He pai hoki ra ki ahau nei te kite tahi, te ako tahi, te mohio tahi, te rongu tahi me te whawha tahi i nga mea e puta ai he mohiotanga he painga hoki ki te tangata. E tino mohio ana ahau ki te peneitia te whakatakoto mai i etahi korero o tau pepa rera tonu e pirangitia e te wahine hei korero ake i nga takiwa e whakata ake ana i nga mahi horoi kaka noa i nga takiwa ranei e whanga ana kia maoa mai nga kai, a i nga takiwi ranei e whanga atu ana kia hoki mai koutou i a koutou haere maha Tooku hiahia kia taia mai e koe etahi korero mo nga mahi keeke nei tiamu nei ranei me era atu tini mea e tika nei kia mohiotia. I na te he ki ahau nei ko te haere ki te pakeha mo nga mea katoa. Kei hea tanei te pukai-tanga o te moni ki te tiki atu i te matauranga o te pakeha. Oira e ta kei te matau iho ano ma te kaha ki te manaaki aru i te taonga nei ka kaha ai hoki koe ki te tuku mai i euei korero e tonoa atu nei. Tukua atu ra tooku aroha ki oku hoa wahine i tawhiti He toro atu ra tena i ou whakaaro mei kore e rite ki aku e tumanako nei kia whakamaramatia ki oku hoa wahine maha me kore e piki ake to matou nei matauranga ki nga tikanga mahi i wehea a e tika ana hoki ma matou nei o nga mahi o roto i nga whare i te kainga hoki. He mokopuna ahau kia Tama-te-Rangi. Waiho, he Mahuru tenei a ko te kakano ko te kopura kua tiria kua rere hei tautoko i a koe ka whaka-tu mai na i tena pou whakamabarātanga mo tooku tupuna Kia piki rawa atu te ora kia rahi nga manaakitanga kia nui nga honore kia koe E tino tika ana tenei ki-Ma matou ma nga uri e tautoko te OHA-AKI a to matou Tupuna i runga i nga mahara whakatekau—"Ehara taku toa i te toa takitahi engari he Toa Takitini." Kia ora tonu koe.

Na to tuahine i roto i nga mahi—H. T. Rapua-i-te-Rangi.